

# Investiziuns a Tschlin causa nouv tip da giasts

**Grazcha a la publicità in differentas gazettas attira il center Baineser a Tschlin ün nouv segmaint da giasts. La società examinescha perquai da cumprar la chasa da scoula e d'adattar las stanzas a las aspettativas da quists giasts.**

Daspö il principi da l'on 2016 exista a Tschlin in l'anteriura chasa da scoula il center Baineser AG. Quel spordscha la pussibilità da frequentar pro maisters shaolins lecziuns da Tai Chi, Shaolin Kung Fu e Qi Gong. Il manader da gestiun es Corsin Biert da Scuol, ils ulteriurs commembers dal team sun ils cusgliers administrativs, il fiduziari Adrian Barbüda da Scuol e l's meidis Andreas Heisler da Bubikon ed Andri Kasper da Scuol. La società anonima ha tut a fit dal cumün da Valsot la chasa da scoula ed investi var 300000 francs in chombras, sala da mangiar ed oter. La passarella e la sala polivalenta po ella dovrar insembel cullas societats culturalas da Tschlin. Quel contrat scrouda da l'on 2021. I'l contrat esa fixà cha'l center Baineser haja da dar inavo la chasa da scoula i'l stadi oriund.

## Spordscher il luxus giavüschà

«Cumanzà vaina cun ün concept chi vaiva in mira giasts chi gnissan a Tschlin a trar a nüz nossa sporta vivond da maniera fich simpla, sumgliainta a la vita dals muonchs da shaolin in China», declera Corsin Biert, «uossa s'ha però müda il segmaint da giasts, nus vain fich bles CEO's e gliedud cun posiziuns plü otas in politica ed economia.» Perquai ha la società Baineser fat al cumün da Valsot la dumonda da fabrica per pudair investir in üna prüm'etappa fin in mai 150000 francs ed in üna seguonda etappa var 300000 francs.



La Baineser AG examinescha la pussibilità da cumprar la chasa da scoula da Tschlin, la sala polivalenta resta in mincha cas inavant a disposiziun eir a las societats.

fotografia: Flurin Andry

«Nouv dessa dar be plü stanzas dublas cun duscha e tualetta.» La radschun chi ha dat quista müdada dal segmaint da giasts nun es tenor el dal tuot cuntshainta. El suppuona però cha quai haja da chefar cun ün grond artichel chi'd es cumparü da prümavaira 2018 illa NZZ am Sonntag: Sün ses paginas d'eira gnü preschantà il center a Tschlin e sias sportas.

Il cumün da Valsot ha dat il permess da fabrica per far quistas investiziuns. «Il cumün ha però signalisà cler e net ch'el nu saja pront, sco descrit i'l contrat da fittanza, da restituir las investiziuns fattas illa chasa da scoula, scha'l center da Baineser vess da gnir scholt o stabili in ün oter lö», accentuescha Victor Peer, il capo cumünal da Valsot.

## La radunanza cumünala decida

Sco cha Corsin Biert disch, sun ils respunsabels da la Baineser AG perquai gnüts a la conclusiun chi nu possan ris-char dad investir in alch chi nu tocca ad els: «Per quel motiv vaina fat al cumün la dumonda da pudair cumprar la chasa da scoula e d'avair uschea üna cuntravalur per nossas investiziuns.» Ch'implü haja la Baineser AG dumandà da pudair restar inavant fittadina da la passarella e la sala polivalenta, ha'l agiunt. Pro l'inscunter ch'el ha gnü culla direziun cumünala es gnüda tematisada la vendita, respectivamaing la cumprita da la chasa da scoula a Tschlin. Il cumün ha dit ch'el guarda scha quai gess a far: «Id es da parcellar, resguardar differents puncts e discuorrer eir davart il

predsch», explichescha il capo cumünal Victor Peer, «scha quai es madür, scha la suprastanza va daperüna cun quai e scha la Baineser SA füss pronta da cumprar il stabel schi suottamettaina quella cumprita a la radunanza cumünala chi ha l'ultim pled in chapitel.»

Sco cha Victor Peer e Corsin Biert dischan nun es per intant nöglia amo concret. «Fin cha quai es il cas, esa da sclerir amo plüs puncts», manzuna Corsin Biert. E Victor Peer agiundscha chi saja previs ün seguond inscunter da la direziun cumünala dal cumün da Valsot cul manader da gestiun dal center Baineser a Tschlin: «In quell'ocasiun giarana plü a fuond a la fatschenda e discutaran eir ils detagls.» (anr/fa)

## Necessari da müdar la zona

L'anteriura chasa da scoula a Tschlin as rechatta in üna zona d'adöver public. «Per pudair realisar nos intent da cumprar la chasa e tilla manar sco previs cun stanzas d'hotel stessa dar ün müdamaint da la zona publica in zona d'hotellaria», constata Corsin Biert, il manader da gestiun dal center Baineser AG a Tschlin. Chi's possa sainz'oter far quista müdada da zonas, disch il capo cumünal da Valsot Victor Peer, «quai douvra però temp.» Cha'l tact dettan aint las ledschas chantunales e federalas. «Eir scha nus ans ingaschessan per accelerar quist müdamaint füssa da far quint cun ün o duos ons», conclüda Victor Peer. (anr/fa)

## Mia Engiadina ha bliers fiers in fö

**Ils commembers da mia Engiadina sun gnüts orientats in occasiun da la radunanza generala a Zernez a regard las activitats da la «community». mia Engiadina es eir ün sinonim pel svilup economic futur illa regiun.**

NICOLÒ BASS

Il Parc Naziunal Svizzer es il plü grond reservat da natüra in Svizra. Daspö raduond 105 ons es quia la natüra patrana da sai sves e quai sainza gnir influenzada da l'uman. Quai nu vuol però dir cha la digitalisaziun as ferma davant ils cunfins dal Parc Naziunal Svizzer. Insomma brich: La gronda cuntrada reservada a la perscrutaziun es bieras jadas statta eir üna regiun da model pel svilup digital. Sco cha Ruedi Haller, respunsabel per la digitalisaziun e futur directer dal Parc Naziunal Svizzer, ha quintà in occasiun da seis referat dürant la radunanza generala da mia Engiadina, es il personal gnü scolà fingià dal 1998 süll'implementaziun dal sistem Mac. Fingià ün on avant hajan ils respunsabels cumanzà a dombrar ils tschiervis cun ün sistem digital. «Daspö il 2003 es tuot digital», ha quintà Ruedi Haller. Intant visitan raduond 150000 personas l'on il Parc Naziunal Svizzer. «Bundant 3000 personas l'on chargin giò l'app dal Parc Naziunal e visitan cun quel las attracziuns. Als scenziats e perscrutaders sta a disposiziun üna



Jon Erni (a schnestra) ed Andrea Zogg han preschantà in occasiun da la radunanza generala a Zernez las activitats da la società mia Engiadina.

fotografia: Nicolo Bass

plattafuorma cun ün'immensa quantità da datas per tuot ils bsögn. «In tuot il Parc Naziunal Svizzer sun installadas 150 traplas cun cameras da fotografar chi registreschan mincha movimaint», ha'l quintà. Sainza lingias sveltas, per exaimpel fibras da vaider, nu füssa tenor Haller, insomma plü pussibel d'elavurar tuot las datas pussiblas.

## 661 commembers da la società

Pro'l chavazzin fibras da vaider vain manzunà eir la collavuraziun cun mia Engiadina. Uschè es stat il Parc Naziunal Svizzer da prüma davent eir parte-

nari da mia Engiadina, chi ha invidà in sonda passada a la radunanza generala da la società a Zernez. In tuot 661 commembers dombra la società «mia Engiadina Community», chi vain presidiada da Jon Erni. Per la fin da l'on 2018 dombraiva mia Engiadina 150 cliaints chi tiran fingià a nüz las spüertas cun lingias sveltas. «Quist nomer da cliaints s'augmentarà vaira svelt per bainquant», ha dit Jon Erni in occasiun da la radunanza, sainza vulair esser ün profet. Intant sun ils cumüns da Zuoz, S-chanf, Zernez, Scuol e Ftan, plü o main accessibels cun lingias da fibra da vaider. Fin la fin

dal 2019 vuol Erni avair ragiunt il nomer da 300 cliaints. Da redüer a mia Engiadina be sün lingias da vaider nun es però güst. «Las lingias da vaider sun simplamaing la basa. Nus vain da prüma davent eir stübgü che chi's po finalmaing lura far landroura», disch l'iniiziant.

## Mountain Hub illa regiun da skis

Intant existan fingià quatter Mountain Hubs ad Ardez, Ftan (IOF), Scuol e Motta Naluns. «Punctualmaing per la stagiun da skis vaina pudü tour in funcziun il Mountain Hub illa regiun da

skis da Motta Naluns», ha quintà Erni als preschaints. Implü collavureschan in tuot desch cumüns da Samedan fin Samignun al proget da scolaziun inizià da mia Engiadina. La plü gronda baja ha Jon Erni però dal proget Inn Hub a La Punt chi vain adüna plü concret. Quia esa reuschi a mia Engiadina da motivar ad üna gruppaziun d'investuors da realisar il proget d'ün center d'innovaziun fich interessant pel cumün da La Punt. Quist proget es gnü elavurà da l'architect cuntshaint Norman Foster. Il suveran da La Punt deciderà in avrigl a regard ils detagls da la collavuraziun.

Cha las ideas da mia Engiadina han ün carisma surregional, demuossa eir la collavuraziun turistica culla plattafuorma discover.swiss e finalmaing eir cul chantun Turgovia. Uschè maina per exaimpel Jon Erni üna gruppa da lavur chi adatescha las visiuns da mia Engiadina eir pel chantun Turgovia (Smarter Thurgau). Eir la Regenza grischuna ha incumbenzà a mia Engiadina d'elavurar ün concept per la digitalisaziun in Grischun. Per realisar quist concept ha la Regenza approvà ün preventiv da 35 fin 70 milliuns francs. Uschè chi vain in avegnir investi blier illas ideas da mia Engiadina ed illa digitalisaziun cun lingias sveltas.

Chi nu sto adüna be ir svelt, ha muossà Bibi Vaplan cun sias chanzuns in occasiun da l'aperitiv in seguit a la radunanza da mia Engiadina i'l auditori dal Parc Naziunal Svizzer a Zernez.

Las activitats ed occurrenzas da mia Engiadina as vezza sün [www.miaengiadina.ch](http://www.miaengiadina.ch)